

PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : YB DATO' SRI HAJI ABDUL RAHMAN BIN
MOHAMAD [LIPIS]**

TARIKH : 10 JULAI 2019 (RABU)

SOALAN NO. 12

Minta **MENTERI SUMBER MANUSIA** menyatakan usaha Kerajaan mengatasi kadar pengangguran yang semakin meningkat sebanyak 9.4% bersamaan 204,000 orang sejak Kerajaan Pakatan Harapan mengambil alih pemerintahan dari Kerajaan terdahulu.

JAWAPAN

Tuan Yang di-Pertua,

1. Berdasarkan kepada Laporan Penyiasatan Tenaga Buruh, Jabatan Perangkaan Malaysia, kadar pengangguran pada suku tahun 2019 mencatatkan kadar 3.3% manakala kadar pengangguran belia adalah 10.9%. Mengikut takrifan *Organization for Economic Co-Operation and Development* (OECD) 1999, negara yang mencatat kadar pengangguran di bawah 4% dikategorikan sebagai guna tenaga penuh atau "*full employment*". Sebagai usaha bagi mengatasi kadar pengangguran, Kerajaan telah mengambil langkah-langkah berikut :

- a) Menyediakan portal perkhidmatan pekerjaan *JobsMalaysia* yang memberi kemudahan kepada pencari kerja untuk mendapatkan kerja yang bersesuaian melalui pendekatan pepadanan kerja serta menganjurkan Program Penempatan Pekerjaan yang merangkumi Karnival Kerjaya, *Client Account*, Temuduga Terbuka, Program Kerjasama Antara Agensi, *Holiday Placement For Students* (HOPS), Penempatan Dengan Kerjasama APS serta Program Penempatan Golongan Khas. Program-program ini telah diadakan dari semasa ke semasa bagi menemukan pencari kerja dengan majikan yang sepadan. Bagi tempoh Januari-Mac 2019, seramai 3,890 orang pencari kerja telah berjaya mendapat penempatan;
- b) Mewujudkan pusat sehenti menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB) dan Unit Peneraju Agenda Bumiputera (TERAJU) di UTC bagi menyediakan khidmat nasihat profesional untuk mendapatkan pekerjaan dan latihan;

SOALAN NO : 12

- c) Mewujudkan program *Graduates Enhancement Programme For Employability* (GENERATE) bertujuan membantu graduan menganggur mendapat latihan dalam bidang berimpak tinggi bersesuaian dengan keperluan industri, selain meningkatkan penawaran pekerja berkemahiran dengan sasaran memanfaatkan 4,000 belia lepasan sekolah dan graduan. Semenjak diperkenalkan pada tahun 2016 sehingga tahun 2018, seramai 3,110 pelatih berjaya mendapat penempatan pekerjaan melalui inisiatif ini;
- d) Memperkemaskan dan memperluaskan program perantisan dan latihan industri yang bertujuan meningkatkan tahap kebolehpasaran belia khususnya graduan melalui latihan *soft-skills* dan *on-the-job training*. Program-program seperti ini telah menunjukkan kejayaan di mana lebih 90 peratus belia yang mengikuti program tersebut mendapat pekerjaan; dan
- e) Menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing.

2. Kesimpulannya, Kerajaan dari masa ke semasa akan menambah baik langkah-langkah sedia ada dan akan mewujudkan lebih banyak program atau mekanisme bagi membantu rakyat mendapatkan pekerjaan dan mengatasi kadar pengangguran negara. Oleh yang demikian, adalah tidak benar dakwaan YB Lipis bahawa kadar pengangguran semakin meningkat sebanyak 9.4% atau sebanyak 204,000 orang.